


Kumtluang

BU NGANA



Pawl-V Mizo

ZING MAK TAK CHU

Tuk khat chu tui êm êma ka mut lai hian thawm ring deuh mai hian minrawn tiharih zawk mai a, hlauthawng êm êmin ka bân chu ka vai ta buan buan a. Ka'n harh chian meuh chuan, chhuat châra lu vaw ri ðhuai khawpin khum aţang chuan ka lo tla thla pek hi a lo ni a. Tu man min hmu lo mah se ka zak ru chem chem tho nia. Tichuan, hmanhmawh takin ka tho thuai a, excercise la turin ka insiam sawk sawk a, nuihza ru angreng tak chuan ka chhuak ta a.

Thui pawh ka la kal hman lo, thawm eng emaw hi ka hria a, eng nge a nih ka hre mai thei lo. Fimkhur takin ka kal phei zel a, mipa naupang pakhat hian an in bul ko panga hnim chu tihfai tumin a chemkawmin a lo ziat ri hreih hreih hi a lo ni a. A bul lawkah chuan hmeichhe naupang pakhat hian an tuallaia bawlhhlawh awmte chu a lo phiat khawm ve mêk bawk a. Ka hriat chian hmaa ka hlauthawn ruk tehreng nen, an tih theih tawh hreh miah lova tih nachang hria naupangte khan min va tilawm tehlul em. Naupang thuawih thei tak an nih dawn hi ti rilru chung chuan ka kal ta zel a.

Kawng chho deuh euh euhva kal ka ni bawh a, ka thlan a tla chu a ni deuh der mai. Ka rawmawl ka phawrh a, ka hmai chu ka hru thuak thuak a. “Pêt rawh, bum la, bin ta che, pêt pawp tur alawm,” tia au ri tuar tuar ka hre zui ta mai a; intibuai an awm ta mai emaw tiin ka kal ta sawk sawk a; mahse, intibuai reng reng ka hmu lo. Veng chhak khelmuala naupang football khelho au thawm chu lo niin; exam chawlh lai te a ni bawh a, an ðhahnem hle lehngal. Khelmual kotlangah chuan din hahchawlh pahin naupang infiam chu ka thlir zui a, ball boot bun leh ke lawnga khelte ðhahnemngaih dan inang reng mai chuan min tihlim ta zawk phian a.

Kal leh mai ka tum lai chuan, mipa naupang pakhat hi hmanhmawh takin a lo tlan chho hlawk hlawk a, ûmtu an awm a nih ngei dawn hi tia lo chhan tum nakalaiin, “Ka pu, hei i pawisa i thlah va,” tih pahin cheng zanga note hi a rawn lek lang ta va va a, chu veleh ka kekawh ipte ding lam chu ka dap ngal vat a, veng thlang bazara chawhmeh leina tur tia ka ah chhuah chu, ka ipte aţanga rawmawl ka phawrh rual khan a lo tla chhuak daih a ni tih reng ka hre lo. Naupang tê ni si, a thil chhar neih mai tum lova, a neitu pêk leh duhna a neih avang chuan lawm avangin ka hnuk a ulh hial a, rinawm ka va ti tehlul em! A thil tih avanga lawm hmêl tak hian a tlan haw leh ta nal a.



Ni a lo chhuak suar suar tawh a, veng thlang lam pan chuan ka kal leh ta a, kawng sir zawl zau deuh laia naupang infiam ri chêl chûl kara ðhianho hlim taka titi bawrh bawrh paha insu thawm chu ka han hria a, an zinga pakhat chuan, “Thawmhnawa aieng leh mawm a kai chuan, toothpaste hnawih ula, in sùk hmian

darkar hnih vel in chiah hmasa ang a; tichuan, in su fai mai dawn alawm,” a lo ti lâwnng lâwnng a. An thiannu pakhat ve thung chuan nui ar ar chungin, “Buara hrui nghet deuhva thil tawn in duh chuan hrui kha tihuh hmasa ula; fanghmir tihrem in duh leh, an lo kalnaah khan aieng phul thet thet ula, an rem duak mai ang,” a lo ti ve bawk a. An thil sawi chuan ka beng a verh hle a, hmangchang an hria ka ti hle mai.

Tichuan, veng thlang bazar chu ka thleng thla ta a. A sir bera thu chawhmeh zawrh chu cheng za man ka leisak a, a man ka pek lai chuan a bula a fanu hmeichhe naupang kum sawm bawr vel awm mi hian, “Cheng zali kir tur,” zawi sap hian arawn ti reuh va. Chu veleh rang fahranin, “Engtin nge i hriat?” ka ti thuai a. Ani chuan, “Belh leh paih kan zir daih tawh alawm,” a lo ti sam et a. Mahni zirlai a tak taka hman nachang hria naupang eng zat tak awm ang maw ti rilru chungin kan in lam pan chuan ka kalsan ta a.

Ka hawn kawnga khawnvartui la tur naupang lo intlar thap te, an zawh taw bur kenga, tui lo khai tang tang naupangte chuan ka rilru chhungril an luah a, min va tihlim hlawm tehlu em. Khang naupangho zawng zawng khan anmahni bakah an chhungte thlengin an chawimawi a ni.



In ka thlen meuh chuan ni pawh a lo tlangsang ta hle mai a, bathlarah thut hahdam paha thingpui no dawm vang vang chungin, zing kar hun ka hman dan leh ka thil tawn inang lo tak takte chu ka ngaituah let neuh neuh va. Kan khawtlang fai ta em em mai te leh kan ranvulh enkawltu nei lo ang maia chhuak sup sup thin hmuh tur awm ta lo te chuan ka rilru a tilawm tak zet a ni. Hetiang reng renga zing hlimawm leh manhla hi ka tawng leh ang em tiin ka inggaituah a, zing mak tak chu a va ni em!

Thu pawimawhte

thawm fimkhur hmangchang thuawih

ti rilru hnuk ulh nachang chawimawi

TIH TURTE

1. Heng zawhnate hi chhang rawh.

(a) Naupang fel ni turin engte nge tih ngaia i hriat?

(aw) In lamah eng hna nge in thawh thin?

(b) Zing dar eng zatah nge i thawh thin? Zing kar hun i hman dan indawt zia chhuak la, sikul i ban hnua eng nge i tih thin zia baw rawh.

2. A awlahte hian dah khat rawh.

(a) Mipa naupang pakhat hian an in bul ko panga _____ chu tihfai tumin a _____ chuan a lo ziat a.

(aw) A neitu _____ leh duhna a neih avang chuan lawm avangin ka _____ a ulh hial a.

(b) Kan khawtlang _____ ta êm êm mai te leh kan _____ enkawltu nei lo ang maia chhuak _____
thin hmuh tur awm ta lo te chuan ka rilru a _____ tak zet a ni.

3. A hnuaia thu hi Mizo ṭawng ziah dan dik takin ziaḱ ṭha rawh.

khawvelah hian mi hang te mi ngo te mi eng te kan awm a kan vaiin pathianin duh taka a siam mihring kan
ni vek a kan intluk tlang vek a tumah ropui bik leh ngaihneṭ tur bik kan awm lo. Thil ṭha kan ti thei vek a tu
pawh mi taima leh huaisen, theihtawp chhuaha hna thawḱ apiangte chu an hlawhtling thei vek

4. Heng thu hmang hian sentence siam rawh.

manhla fimkhur thuawih chawimawi

5. A hnuaia thu awm hi nalh takin ziaḱ chhuak rawh.

*Bawlhhlawh a bawmah ka paih ṭhin ang. Ka taksa fai taka enkawlin, dikna leh rinawmna nunpuitu nih zel ka
tum ang.*

6. Sawi ho tur.

Chhungte chawimawina tha ber nia in hriat sawi ho ula, chung in sawite chu ziaḱin chhinchhiah ang che u.

7. Project.

In zirlai buin hmangchang a sawi ang chi thil dang zawng chhuak la, ziaḱ ve rawh.

Sl.No	Harsatna	Hmangchang
1	Fanghmir tam lutuk	An lo kalna ah aieng phul ṭhet ṭhet

Table of Contents

[ZIRLAI 13](#)
[ZING MAK TAK CHU](#)
[Thu pawimawhte](#)
[TIH TURTE](#)